

## DOMINGU XXVII TEMPU KOMÚN – TINAN B

### Tema Domingu XXVII nian

Leitura sira Domingu da-27 apresenta nu'udar tema prinsipál, Maromak nia projetu ideál ba mane no fetu: forma komunidadé ida domin nian, estável no indissolúvel, hodi tulun malu atu sai haksolok. Domin ne'ebé halo iha saran-an no entrega, sai ba mundu reflexu Maromak nia domin nian.

*Leitura dahuluk* dehan katak Maromak hakiak mane no fetu atu kompleta malu, atu tulun malu, atu hadomi malu. Ida de'it iha domin, mane no fetu sai "isin ida de'it". Sai "isin ida de'it" implika moris iha komuñau total ba malu, fahe malu moris, metin iha domin.

Iha *Evanjellu*, Jezús, hodi konfronta Lei judaika divórsiu nian, afirma filafali projetu ideál Maromak nian ba mane no fetu: sira simu bolun atu forma komunidadé estável no indissolúvel domin nian, partilla no doasaun nian. Iha Maromak nia projetu nia la prevé separasaun, basá Maromak la konsidera domin ida ne'ebé la'ós total no la dura iha tempu. Domin rohan-laek, iha kompromisu indissolúvel de'it, maka respeita projetu dahuluk/primordiál Maromak nian ba mane no fetu.

*Leitura daruak fó* hanoin mai ita kona-ba Maromak nia domin ba ema sira nia "kualidade"... Maromak hadomi ema tebes to'o haruka nia Oan mesak. Jezús sai solidáriu ho ema sira, hodi kumpre Aman Maromak nia projetu, simu atu mate iha krús atu dehan ba ema sira katak moris loos maka domin to'o ba nia konsekuénsia ikus liu. Hodi liga Surat ba Ebreu sira ho tema mahuluk liturjia domingu ne'e nian, ita bele dehan katak kabe-na'in/kazál kristaun tenke testemuña, ho nia doasaun laho limite no ho ninia entrega total, Maromak nia domin ba umanidade .

### LEITURA I – Gn 2,18-24

#### MENSAJEN

Hakiak tiha mane no tau iha "jardín" ksolok nian, Maromak nota mane nia solidaun (moris mesak) no hakarak fó ba nia solusaun. Oinsá?

Uluknanai hodi lori balada sira no manu sira atu ema tau naran (vers. 19). Tuir ideia Médiu Oriente antigu, tau naran maka hahalok domínium nian no posesu nian. Husi perspetiva katekista jahwista nian, hahalok ne'e hatudu Maromak rekoñese ema nia autonomia no ninia asosiasaun ba obra kriadora Maromak nian. Autoridade ba kriatura seluk no ema nia asosiasaun ba Maromak nia kriaun hatán ba ema nia hakaran ksolok nian ne'ebé kompletu hodi rezolve ninia solidaun? La'e ida. Ema la hetan iha mundu balada nian "tatulun ida hanesan nia" (vers. 20). Maski mundu ne'e riku no furak oinsá, ema la hetan iha nia tulun no komplementu ne'ebé nia hein. Maromak tenke intervein fali atu ema bele realiza an completamente.

Maromak nia asaun foun hahú ho "dukur todan" mane nian. Hafoin, Maromak hanesan doutór sirurjiaun ida, hasai ema nia isin baluk ida (testu ko'alia kona-ba "zela", be tradús nu'udar ruin knosan, maibé bele signifika sorin) no ho nia halo fetu (vers. 21-22). Tanba sá mane dukur todan? Tanba tuir autór jahwista nia hanoin, kria maka segredu Maromak nian no ema labele testemuña momentu misteriozu no solene ida-ne'e; nia presiza mak admira Maromak nia kriaun no adora Nia ba ninia obra furak sira... Halo tiha fetu, Jahwéh akompañia nia ba mane nia oin. Iha ne'e apresenta fetu hanesan noiva ne'ebé lori ba noivu nia

oin no Maromak hanesan “padriñu” noivadu ne’e nian. Mane, hadeer husi “dukur todan”, simu feto ho hakilar ida ksolok nian no simu nu’udar maluk ne’ebé nia seidauk hetan, ninia komplementu, nia an seluk: “ida-ne’e maka ruin husi ha’u-nia ruin no isin husi ha’u-nia isin” (vers. 23a). Mane (vers. 23b) hanaran nia kompañeira “feto” (iha ebraiku: 'ishah) basá hasai husi mane (iha ebraiku: 'ish). Liafuan rua ne’e ninia prosimidade sujere prosimidade entre mane no feto, sira-nia igualdade fundamentál iha dignidade, komplementaridade parentesku. Testu taka ho komentáriu autór nian: “tanba ne’e mane sei husik nia aman no inan no ba hamutuk ho nia kaben, no sira rua sai isin ida de’it” (vers. 24). Komentáriu ida-ne’e hakarak sai resposta ba kestaun konkreta ida: husi ne’ebé maka mai kbiit boot ida-ne’e hanaran domin ne’ebé forte liufali talin ne’ebé kesi ita ba inan-aman sira? Ba katekista jahwista, domin mai husi Maromak, ne’ebé halo mane no feto husi isin ida de’it; tanba ne’e, mane no feto buka unidade ida-ne’e no iha destinu atu moris iha komuñau ba malu.

## **SALMU RESPONSORIÁL – Salmu 127 (128)**

### **LEITURA II – Heb 2,9-11**

#### *MENSAJEN*

Jezús aseita atu hamamuk an husi ninia divindade no halo an “sai ki’ik liu anju sira”, atu husi don nia moris no mate nian, bele kumpre Maromak nia projetu maksoin ba ema sira (vers. 9). Afirma tiha buat ne’e, autór Surat ba Ebreu sira hakle’an ninia reflexaun no esplika tanba sá Jezús tenke liu husi haraik-an krús nian (vers. 10-18).

Paixaun no mate Kristu nian maka konveniénsia ida projetu salvasaun nian husi Maromak. Ne’e signífika katak Maromak nia objetivu maka ema buras hodi to’o ba moris nakonu. Atu halo umanidade bele to’o iha finalidade ida-ne’e, Maromak fó gia ida – Jezús Kristu. Nia tenke hatudu ho Ninia vida no ezemplu, katak ita bele to’o ba moris nakonu hodi kumpre integralmente Aman Maromak nia hakaran no halo ita-nia ezisténsia don id ba maun-alin sira. Krús mak espresaun aas liu no totál vida ne’ebé saran an ba Maromak nia projetu no doasaun ba maun-alin sira. Hodi mate tanba domin, Jezús hanorin ema sira oinsá maka sira tenke moris, dalan ida-ne’ebé mak sira tenke tuir, atu to’o ba plenitude moris nian, ksolok rohan-laek; hodi mate tanba domin no moris-hia’s fali Jezús liberta ema sira husi ta’uk mate nian no hatudu ba sira katak mate la’ós liña nia rohan ba sira ne’ebé moris iha entrega-an ba Maromak no doasaun ba maun-alin sira.

Hodi asume natureza umana, hodi sai solidáriu ho ema sira, hodi sai ema sira nia maun-boot, Kristu (ida-ne’ebé santífika) hatama ema sira (sira ne’ebé simu santifikasaun) iha Maromak nia órbita no hatudu sira dalan atu tuir hodi bele integra an iha Maromak nia família (vers. 11).

### **ALELUIA – 1 Jo 4,12**

### **EVANJELLU – Mc 10,2-16**

#### *MENSAJEN*

Hasoru kestaun ne'ebé farizeu sira foti (mane ida bele soe nia feen? – vers. 2), Jezús hahú hodi fó hanoin ba sira sá maka Lei husu (vers. 3). Ne'e la dehna katak, Jezus identifika An ho Lei nia pozisaun kona-ba kestaun divórsiu nian.

Efetivamente, Lei permite divórsiu (vers. 4); maibé, Lei nia lisensa la'ós Maromak nia projetu ba mane no feto maibé, rezultadu husi “ema nia fuan toos”. Moisés nia Lei la define kuadru ideál domin nian entre mane no feto, maibé regula de'it kompromisu matrimoniál, hodi hanoin de'it ema nia hakaran sira.

Kontráriu ba permisividade Lei nian, Jezús apresenta projetu primordiál Maromak nian ba mane no feto nia domin. Hodi temi ho modu livre pasajen Gn 1,27 no Gn 2,24, Jezús esplika katak, iha projetu orijinál Maromak nian, Nia hakiak mane no feto, atu kompleta malu, atu tulun malu, atu hadomi malu. Hamutuk iha domin, mane no feto forma “isin ida de'it”. Sai “isin ida de'it” implika moris iha komuñau totál entre sira, hodi saran an ba malu, fahe moris ba malu, metin iha domin ida de'it, ne'ebé forte liufali tali uniaun seluk. Separasaun hatudu frakasu domin nian; ba Maromak domin mak rohan-laek, hatudu iha kompromisu indissolúvel, respeita Maromak nia projetu primordiál ba mane no feto.

Jezús nia perspetiva kona-ba kestaun ne'e mak tuirmai ne'e: iha realidade foun ne'ebé Maromak hakarak propoin ba ema (Maromak nia Reinu), to'o ona momentu atu husik hahalok nara-naran, laran-makerek, fasilidade sira no buka buat be aas liu. Kona-ba moris kaben-na'in nian, buat aas liu mak Maromak nia projetu inisiál ba mane no feto sira ne'ebé prevé kompromisu domin estável, duradouru, indissolúvel.

Ba eskolante sira, Jezús nia diskursu ne'e difisil atu komprende; tan ne'e, bainhira sira to'o iha uma, sira husu ba Jezús esplikasaun suplementár (vers. 10). Jezús haktuir fali de'it katak relasaun entre mane no feto tenke enkuadra iha projetu inisiál Maromak nian no la'ós iha fasilidade ne'ebé Lei Moisés nian fó. Maromak nia perspetiva maka la'en no feen, kesi iha domin, forma comunidade ida vida estável no indissolúvel nian. Divórsiu la tama iha projetu ne'e. La'en no feen, iha igualdade sirkunstánsia nian, responsavel ba comunidade familiár nia edifikasaun no responsavel atu evita frakasu domin nian (vers. 11-12).

Testu ne'ebé propoin mai ita taka ho Jezús ne'ebé simu labarik sira, defende sira no fó bengan ba sira (vers. 13-16). Labarik sira iha-ne'e, mak kontrapozisaun ida ba foti-an no arrogánsia ne'ebé fariseu sira hatudu bainhira hasoru Jezús, nune'e mós eskolante sira nia difikuldade atu simu lójika Reinu nian... Labarik sira simples, transparente, laho kalikulizmu; la soi prestíjiu ka priviléjiu atu defende; entrega an ho konfiansa iha aman nia liman no hein husi sira buat hotu, ho domin. Tanba ne'e labarik sira maka modelu eskolante sira-nian.

Maromak nia Reinu pertense ba sira ne'ebé, hanesan labarik sira, moris iha sinseridade no lialoos, hodi la preokupa ho sira-nia interese egoísta ka sira-nia priviléjiu nia defeza, hodi simu Maromak nia proposta ho simplisidade no domin. Sé maka la'ós labarik, katak sé maka la'o tuir dalan kle'uk no kalkulista nian, eé maka la hakribi foti-an no autosufisiénsia, sé maka despreza Maromak nia lójika no konta de'it lójika mundu nian (iha mós kestaun kazamentu no divórsiu nian), sé maka lori nia moris tuir de'it sabór interese no valór efemeru (liu lalais sira), sé maka la aseita atu ema kuestiona ninia rasiósiniu ka hanoin rasik no ninia prekonseitu sira, la bele integra iha comunidade Reinu nian.